

Headlines

- 1 राष्ट्रपति द्रौपदी मुर्मू होंरें अज्ज राष्ट्रपति भवन च गवर्नरें दे द'ऊं रोजा सम्मेलन दा उद्घाटन कीता।
- 2 प्रधानमंत्री नरेंद्र मोदी होंरें कल नमीं दिल्ली च कृषि अर्थ शास्त्रियें दे 32में अंतरराष्ट्रीय सम्मेलन दा उद्घाटन करंगन।
- 3 मुख् सचिव होंरें अज्ज राष्ट्रीय जरनैली रसद प्रबंधन लिमिटेड कन्ने मीटिंग लाइये पर्वतमाला तैहत केंद्र शासित प्रदेश जम्मू-कश्मीर च कीते जा'रदे बक्ख-बक्ख परियोजनाएं दी प्रगति दा जायजा लैता।
- 4 बीएसएफ दे विशेष महानिदेशक वाई.बी खुरानिया होंरें जम्मू खित्ते च अंतरराष्ट्रीय बन्ने उप्पर सुरक्षा स्थिति दा जाजया लैता।

<><><><><><>

President

राष्ट्रपति द्रौपदी मुर्मू हुंदी अध्यक्षता च अज्ज राष्ट्रपति भवन च द'ऊं रोजा राज्यपाल सम्मेलन शुरू होआ। गवर्नरें दा एह पैहला सम्मेलन ऐ जेदी अध्यक्षता राष्ट्रपति द्रौपदी मुर्मू होंरें कीती। इस सम्मेलन च राज्यें ते गवर्नरें हिस्सा लैता। उपराष्ट्रपति जगदीप धनखड़, प्रधानमंत्री नरेंद्र मोदी, बक्ख-बक्ख केंद्री मंत्रियें जिंदे च अमित शाह, धर्मेंद्र प्रधान, अश्विनी वैष्णव ते डा. मनसुख मांडविया ते होंर दुए मंत्री बी शामिल होए। इक सोशल मीडिया पोस्ट च मोदी होंरें आखेआ जे एह इक महत्वपूर्ण मंच ऐ जेदे च उनें एह चर्चा कीती जे राज्यपाल कियां समाज दे विकास च बाद्दा करी सकदे ना। नीति आयोग दे प्रधान ते सीईओ प्रधानमंत्री कार्यालय दे वरिष्ठ अधिकारियें ते गृह मंत्रालय च कैबिनेट सचिवालय दे होंर दुए वरिष्ठ अधिकारियें बी इस सम्मेलन च शिरकत कीती। सम्मेलन दे मुख् एजेंडे च त्रै आपराधिक कनूनें दी अमल-आवरी, उच्च शिक्षा च सुधार ते विश्वविद्यालयें गी मान्यता, जनजातीय लाहकें दा विकास, आकांक्षी जिले ब्लाक्स ते बन्ने कन्ने लगदे लाहकें दा विकास, My Bharat एक भारत श्रेष्ठ भारत ते एक पेड़ मां के नाम, मुहिम च गवर्नरें दी भूमिका बी शामिल ही। राज्यें च बक्ख-बक्ख केंद्रीय एजेन्सी बश्कार तालमेल बनाइये कम्म कराने च गवर्नरें दी भूमिका ते जन संपर्क बी सम्मेलन दे एजेंडे च शामिल हा। राज्यपाल बक्ख-बक्ख समूहें च इनें जेंडा मुद्दें उप्पर विचार विमर्श करडन। समापन सत्र च एह समूह, राष्ट्रपति, प्रधानमंत्री ते दुए प्रतिभागिं अगगे पेशकारी करडन।

<><><><><><>

PM-Agri Conf.

प्रधानमंत्री नरेंद्र मोदी होंर कल नमीं दिल्ली च कृषि अर्थ शास्त्रियें दे 32में अंतरराष्ट्रीय सम्मेलन दा उद्घाटन करडन। इस मौके ओहू किट्ट अगगे भाषण बी देडन। त्र'ऊं-त्र'ऊं बरें लगगने आहली एहू कांफ्रेंस अज्जै थमां शुरू होई ते औंदी 7 अगस्त गी खत्म होग। एहू सम्मेलन भारत च 65एं बरें परेंत लगगा करदा ऐ। एहदा मकसद आलमी सतह पर मजूद चुनौतिं जिआं जलवायु परिवर्तन, घटदे कुदरती संसाधनें, उत्पादन लागत बधने ते बक्ख-बक्ख तनाजें दे मद्देनजर राई-बाई दे टिकाऊ तौर-तरीकें दी जरूरतै पर जोर पाना ऐ। एहू सम्मेलन युवा शोधकर्तां ते अगुआ पेशेवरें गी इक ऐसा मंच उपलब्ध करोआया जेदे राहें ओहू दुनिया दे अगगे अपना कम्म ते नेटवर्क पेश करी सकडन। एहदा मकसद शोध इदारें ते युनिवर्सिटीं बश्कार सांझ-भ्याली गी पक्का करना, राष्ट्री ते आलमी दौनें सतहें पर नीतियां बनाने दे कम्मै गी बेहतर बनाना ते भारत दी कृषि दे खेत्तर च प्रगति गी प्रदर्शित करना ऐ। 75 मुलखें थमां तकरीबन 1 ज्हार डेलीगेट एहदे च हिस्सा लैडन।

<><><><><><>

PM-Pingli

प्रधानमंत्री नरेंद्र मोदी होंरें राश्ट्री झंडे गी आकार देने आले म्हान स्वतंत्रता सेनानी पिंगली वेंकैइया होंरें गी अज्ज उंदी बरे गंड पर चेत्ता कीता ऐ। सोशल मीडिया दी इक पोस्ट च श्री मोदी होंरें आखेआ जे राश्ट्र गी तिरंगा झंडा देने च पिंगली वेंकैइया हुंदे जत्तें गी सदा चेत्ता कीता जाग। प्रधानमंत्री होंरें लोकें गी आखेआ जे ओहू 'हर घर तिरंगा' अभियान कन्नै जुडन ते इस म्हीने दी 9 शा 15 तरीक बश्कार पक्क गै अपने घरें पर तिरंगा फैहरान। उनें लोकें गी आखेआ जे ओहू तिरंगे दे कन्नै अपनी सेल्फी गी Portal www.harghartiranga.com पर अपलोड करन।

<><><><><><>

LS-AIIMS

सरकारै अज्ज आखेआ ऐ जे ओहू मुख दे बक्ख-बक्ख हिस्सें च खोले गेदे एम्स अस्पतालें दे म्यार गी बरकरार रक्खना चाहंदी ऐ ते बेहतरिन डाक्टरें गी उत्थे कम्मै पर लाने दी कोशश कीती जा'रदी ऐ। अज्ज लोकसभा च इक जिमनी सोआल दा परता दिंदे होई सेहत मंत्री जगत प्रकाश नड्डा होंरें गलाया जे प्रधानमंत्री नरेंद्र मोदी होंरें मुख दे हर खित्ते च 17 एम्स खोलने दी कोशश कीती ऐ। उनें आखेआ जे उंदा नजरिया ऐ जे एम्स च इलाज करोआने आस्तै लोकें गी इलाज लेई मुख दे बक्ख-बक्ख हिस्सें थमां दिल्ली नेई औना पवै।

<><><><><><>

Pradhan-SC

शिक्षा मंत्री धर्मेन्द्र प्रधान होंरें आखेआ ऐ जे नीट-यूजी म्तेहान च कुसै बी चाल्ली दी बवस्थित चूक नेई होने ते इस करयै परतियै म्तेहान नेई करोआने दे सुप्रीम कोर्ट दे फैसले कन्नै सरकार दा रौं स्हेई साबत हुंदा ऐ। सोशल मीडिया दी इक पोस्ट च श्री प्रधान होंरें आखेआ जे सरकार पारदर्शी ते त्रुटि-रैहत म्तेहान प्रणाली लेई बचनबद्ध ऐ। उनें आखेआ जे इसी यकीनी बनाने आस्तै सरकार माहिरें दी इक उच्च स्तरी कमेटी दिआं सफारशां तौलें शा तौले लागू करोग। मंत्री होंरें आखेआ जे अदालत दा फैसला ओकडे दुष्प्रचार गी पूरी चाल्ली खारिज करदा ऐ जेड़ा फैलाया जा करदा ऐ। उनें इंसाफ करने ते लक्खां बदे विद्यार्थिं दे हितें दी राक्खी लेई सुप्रीम कोर्ट दा धन्नवाद कीता।

<><><><><><>

RS-Bullet

रेल मंत्री अश्विनी वैष्णव होंरें आखेआ ऐ जे बुलेट ट्रेन परियोजना पर कम्म तेज रफ्तार कन्नै चलै करदा ऐ ते 320 किलोमीटर दे हिस्से दा कम्म पैहले गै सबूरा करी लैता गेदा ऐ। अज्ज राज्यसभा च जिमनी सोआलें दा परता दिंदे होई मंत्री होंरें आखेआ जे जपान दे सैहयोग कन्नै अहमदाबाद ते मुम्बई बश्कार पैहली बुलेट ट्रेन परियोजना पर एल्ले कम्म चलै करदा ऐ।

<><><><><><>

CS-NHLML

मुख सचिव अटल डुल्लू होंरें अज्ज राश्ट्रीय जरनैली रास प्रबंधन लिमिटेड कन्नै इक मीटिंग लोआइयै 'पर्वतमाला' तैहत कीते जाने अहिलयें प्रस्तावित बक्ख-बक्ख परियोजनाएं दी प्रगति दा जायजा लैता। इस दौरान मुख सचिव होंरें जम्मू-कश्मीर दे बक्ख-बक्ख सैलसफा थाहरें च रोपवे परियोजनाएं दे निर्माण कम्में दा बी जायजा लैता। मुख सचिव होंरें सार्वजनिक क्षेत्र दे उपक्रमें पर जोर पाया ऐ जे ओहू सारी प्रकिया च तेजी लेआन। उनें मुतल्लका विभाग गी केंद्रीय इदारें कन्नै तालमेल बनाइये कम्म करने लेई बी गलाया तां जे हर मसले दा हल समें उप्पर कीता जाई सकै। मुख सचिव होंरें साम्बा च साज समेयान मुतल्लक Multi Model Logistic park दी स्थापना ते सार्वजनिक यातायात टर्मिनल सरबन्धी ढांचे दे विकास दे कम्म च तेजी लेआने दा आह्वान बी कीता। मीटिंग च मुख मुद्दे ते उंदी मौजूदा स्थिति बारै तफसीली चर्चा बी होई।

<><><><><><>

ST-GST

स्टेट टैक्स मैहकमे दिएं एडीशनल कमिशनर नम्रता डोगरा होरें करदाताएं गी जालसाजें आस्सेआ फर्जी क्यू.आर कोड इस्तेमाल करने ते बिक्री च कमी दर्शाने दे माडे नतीजें बारै खबरदार कीता ऐ। उनें डीलरें गी आखेआ ऐ जे ओहू बेल्ले सिर जानकारीयां हासल करने लेई जीएसटी पंजीकरण गित्तै अपने फोन नंबर ते ई-मेल दा इस्तेमाल करन। जम्मू दे सर्कल-बी दे करदाताएं कन्नै लाई गेदी इक बैठक दी प्रधानता करदे होई नम्रता डोगरा होरें इस माली बरे दी पैहली तिमाही दी माली स्थिति दा जायजा लैत्ता ते अगली त्रै तिमाहिं लेई राजस्व गित्तै रणनीति तैयार कीती।

<><><><><><>

SDG-BSF

सीमा सुरक्षाबल दे विशेष महानिदेशक वाई.बी खुरानिया होर अज्ज अपने द'ऊं दिनें दे दौरे उप्पर जम्मू पुजे ते खित्ते दी च अंतरराष्ट्रीय बन्ने दी सुरक्षा स्थिति दा जायजा लैता। आकाशवाणी जम्मू दे संवाददाता नै जानकारी दित्ती ऐ जे खुरानिया हुंदा स्वागत बीएसएफ दे I.G D.K Bura ते जम्मू फ्रंटियर दे दुए वरिष्ठ अधिकारियें कीता। एहू बैठक अंतरराष्ट्री सीमा उप्पर बन्ने पार थमां घुसपैठ दे खतरे दे पछौक्कड़ च लग्गी। इस दौरान बूरा होरें बन्ने कन्ने लगदी सुरक्षा स्थिति दा व्यापक पेशकारी कीती। मीटिंग च जम्मू खित्ते दी सुरक्षा स्थिति उप्पर ध्यान केंद्रित कीता गेआ। अपने दौरे दौरान खुरानिया होरें जवानें गी अपने करतब दी पालमा पूरी तनदेई कन्नै करने लेई उंदी सराहना कीती।

<><><><><><>

LS-ICMR

कोवैक्सीन दवाई गी सांझे तौर पर विकसित करने लेई मेडिकल शोध सरबंधी भारती कौंसल- ICMR गी भारत बायोटेक इंटरनेशनल लिमिटेड थमां रायलूडी दे तौर पर 172 करोड़ रपे थहोए न। लोकसभा च इस बारै जानकारी दिंदे होई सेहत मंत्री जे.पी नड्डा होरें गलाया जे कोवैक्सीन लेई पेटेंट दायर करदे होई ICMR दा नां नेई जोड़ने पर सरकार दे ऐतराज मगरा भारत बायोटेक नै एहू गलती सुधारी लैती। उनें दस्सेया जे भारत नै 7 मुलखें गी कोवैक्सीन दित्ती ऐ।

<><><><><><>

GDC-Kathua

Govt. Degree College महानपुर च पैहली बारी 2024-25 आहले शैक्षणिक सत्र च साइंस सब्जेक्ट गी शामिल कीता गेआ ऐ। एहूदे बारै गल्ल करदे होई संगीता सुदन होरें स्टाडे संवाददाता प्रदीप शर्मा होरें गी दस्सेया।

<><><><><><>

DC-Jammu-Swacchta

जम्मू दे डिप्टी कश्मिनर सचिन कुमार वैश्य होरें कल टीचर्स भवन जम्मू च स्वच्छता पखवाडा 2024 दे जश्र दी शुरूआत कीती। इस कार्यक्रम च जिले दे मुख अधिकारियें सनें एसएसपी-डॉ. विनोद कुमार, विद्यार्थी, पंचैती इदारें दे मिम्बरें ते प्रतिनिधियें हिस्सा लैता। अपने संबोधन च डीसी होरें स्वच्छता गी अपने जीवन दा इक जरूरी हिस्सा बनाने लेई गलाया डी.सी होरें समाज दे हर वर्ग गी साफ-सफाई सरबंधी कम्मा च सहयोग देने दी जरूरत उप्पर जोर पाया। उनें प्लास्टिक कचरा प्रबंधन, प्लास्टिक कन्नै बने दे सम्यान गी घट्ट इस्तेमाल करने ते ग्राएं ते चे करी शैहरें गी हरा-भरा बनाने दे कम्मै गी यकीनी बनाने लेई इक व्यापक नजरिया अपनाने लेई बी गलाया। डी.सी होरें विद्यार्थियें अपने घरें स्कूलें ते आंड-गोआंड च साफ-सफाई गी यकीनी बनाने लेई बी गलाया।

<><><><><><>